

雲南叢書

李子中谿全集

趙藩題

雲南叢書集部之六

李中谿全集

共十卷

重刊中谿彙稿序

公曆一九五一年四月 宣日 熊秉真家藏捐獻

明太和李中谿先生所著詩文曰中谿家傳彙稿者計詩四卷文六卷萬厯庚辰巡按劉維金滄道胡僖所刊距今三百餘年兵燹屢經刊版久毀傳本亦稀太和周君霞收有鈔本昆明陳君榮昌索得之以付騰衝李君根源重刊行世先生以詞臣出爲知縣治最擢御史巡按閩中尋改授荊州郡守厯官皆有聲績罷歸優游林下四十年乃歸道山先生學問博通明習吏事未竟厥用晚而究心性命之旨兼涉佛藏與羅念庵王龍谿上下其議論所得亦與念庵龍谿爲近於姚江爲私淑弟

子方先生守江陵時識拔張太岳於童子軍中迨太岳
柄國先生里居書問不絕而言俱不及私時論兩高之
先生所爲詩文根抵磅礴塗軌雅正新都楊升庵謫滇
先生與同里楊士雲保山張含晉甯唐錡昆明胡廷祿
阿迷王廷表與爲山水文字交唱喁登覽相得劇歡綜
先生生平學識趣尙出處交游就集中詩文求之十可
得其八九有本有文足式後學無竢覲縷李君屬爲序
迺述重刊之緣起而粗撮先生學行大要書之首簡
中華民國二年癸丑春正月劍川後學趙藩撰

重刊中溪家傳彙稿序

佛學自漢明帝時入中國而盛於六朝與唐其學以修真養性鍊形固氣爲宗不使纖毫物欲足以動其心此與吾儒之誠正修身初無大異其事功則以慈悲救世化無量眾生於善域而消除其惡念貴賤平等一視同仁此與吾儒治平之學亦無大異旣與儒學無大異如此故足以輔翼治化厯世存而不絕非其亦有獨至者與自不善學之者遁於空虛入於寂滅以爲獨善其身而世之憂樂則漠然於中甚至怪誕荒渺惑世誣民以求福田利益爲戾於天下世乃以佛學爲詬病鉅儒輩

辭而闢之。主比諸洪水猛獸之毒民。欲屏諸中國外。夫佛學之弊。何渠至此。其至此者。以世無真佛學也。然世無真佛學。則佛學足以亂天下。若世無真儒學。而以儒學亂天下者。其弊又可勝言哉。吾滇李中溪先生理學鉅儒也。先生之學。以佛入。以儒出。復性爲本。濟世安民爲用。故厯官內外。格君惠民。卓然有經世才。見稱於時。及發爲文章。一皆抒寫其所學。而於佛旨尤三致意焉。中年著心性圖說。亦頗參用佛旨。實則與周子太極圖說相爲表裏。當時如羅念庵王龍溪唐荆川楊升庵諸君子。皆極推服。特滇僻處西南。無有表章其學說者耳。

今里中相傳先生乃仙去其說固不足據然觀先生爲人眞儒也卽以爲仙亦無不可夫神仙之說昔賢每以爲妄嘗竊謂世果有神仙亦必聖賢君子而後能爲如古忠烈之士立功天壤間正氣耿耿不滅庸愚皆知崇奉豈得謂非神仙哉然則人以先生爲仙又何疑耶根

源

西征藏事裏糧遊雞足山所至輒見先生手蹟愈爲慨慕流連想像其爲人恨不得起先生而從之遊也曩在庚戌之歲吾師陳小圃以是集見示旣付錢木會有事西行屬同門施君少雲檢校至壬子仲秋西師凱旋施君以書成告爰綴生平景仰先生之學旨於簡端俾

讀先生書者知先生樹立如此則知佛學與儒學皆非
無益於身世者也至先生出處本末及詩文之足以不
朽集中序傳已詳之茲不復覲縷云民國二年歲次壬
子仲秋騰衝後學李根源謹撰

重刊中谿彙稿序

宋儒學說之盛無如朱陸然朱子先從事於道問學而陸子先從事於尊德性當時二子辨論太極圖說意見已有牴牾從之游者又各守師說爭門戶以求勝於是朱子之徒羣相鼓煽至詆陸學以爲禪後之尊崇朱子者亦排擊之而比於異端陸學乃寢衰矣夫朱陸之匡君治民載在史冊皆實而可徵世之學者不求其躬行之所在以師其爲人而顧執其學說之同異聚訟紛如不其末歟即云爲道而辯黨伐亦殊甚矣由宋訖明且三四百年朱子之書人皆知誦習之而推重陸學者惟

陽明而已蓋陸子言良知陽明亦言良知陸子以悟得
陽明亦以悟得故耳當王學盛行講學者徧天下而吾
滇則有李中谿先生先生之學歸本於復性自明而誠
又頗究心釋典以參儒理在無識者鮮不以爲禪學矣
而不知實與陸學相近觀其所著心性圖說發明本覺
眞悟之旨亦陸子之存心養心而無戕賊無放失者耳
至其守荊州守江陵已去而民猶思之殆亦荊門遺愛
歟若夫優游林下四十年寄情山水詩文以自娛樂則
又陸子所忻羨而不可必得者也然先生之學如是而
滇以外無聞焉且滇亦鮮有能紹述其學者是則文獻

之衰也吾師陳小圃索得先生鈔本全集以付同門李
君韻泉刊行適韻泉西征屬予檢校予校而讀之然後
知先生之學養之心性體之踐履固淵源於陸子而與
朱子殊塗同歸者也讀先生書者若徒能稱道其學說
又豈足以知先生哉民國紀元壬子孟春月昆明後學
施汝欽謹撰

刻中谿李先生集序

中谿李先生自選館入臺以及治郡還山凡有感發著
爲文辭咸載是集每部使者至滇慕先生道德文章之
盛必肅謁請觀其集或卽捐廩餽餽先生俾梓以傳先
生究心方外之學以施與爲事盡散所餽未遑刻集以
故集久未傳亦其重德惠而輕文章不以銜奇見美爲
高也昔先生侍

世廟狩

興都適敝荆缺守

世廟以荆南路衝地重如所謂淮陽股肱郡思得大賢處之

乃卽班中拜先生先生治荆德政及民不可殫述而築
江隄以捍水患備湯藥以活役夫正法度以抑貴勢則
尤表表偉樹深入人心咸頌之不衰者又歲時乘其公
暇時同賓客僚吏雅興登臨問俗覽古民親之如父母
無畏避心先生亦愛之若兒女子藹藹然和煦以遇之
也余時僅四五歲戲竹馬從羣兒見先生道旁越四十
年復得觀滇省風謁門牆望顏色聆謦欬讀其所集而
又詢知集之所以久不傳故於是謀諸分巡金滄憲胡
君公泉共捐梓費屬大理同知何汝質太和知縣孔宗
海督完其事先生亦喜其刻之完也走物幣具書辭徵

予序之余後生末學不能窺先生精蘊卽讀是集不能
解所指歸敢僭序乎雖然余旣幸以兒童見先生又得
以觀風爲先生執役刻集稀邁也詎敢以後生末學之
不文辭茲重委耶敬作是言爲先生復若先生秉知人
之鑒識

元輔少師太岳張先生於妙年今何至

少師受

穆宗皇帝

顧命輔

聖主任

國政純忠至公用感

宮府一體上下一心內安而外順致天下太平直追隆古
此大人正己物正之極致發其機而標薦之者先生也
古稱進賢受上賞則先生之識少師宜來

睿眷少師方欲報先生無由擬其集傳至

京

少師必樂觀而暢敘之也敢書以俟

太守丁君應賓以新任觀厥成者也併書之云

崑

萬曆庚辰歲孟冬吉日

巡按雲南監察御史江陵後學劉維禎首拜撰